

God's Woord Kom Tot Die Profeet

William Marrion Branham

"Jesus Christus is God"

Dit is die openbaring: Jesus Christus is God. Die Jehova van die Ou Testament is die Jesus van die Nuwe. Hoe hard u ookal probeer, u kan nie bewys dat daar DRIE Gode is nie. Maar dit vereis ook 'n openbaring deur die Heilige Gees om u die waarheid te laat verstaan dat Hy Een is. Dit vereis 'n openbaring om te sien dat die Jehova van die Ou Testament die Jesus van die Nuwe is. Satan het die kerk binnegesluip en die mense vir dié waarheid verblind. Nadat hulle vir hierdie waarheid verblind is, het dit nie lank geneem voordat die Kerk van Rome opgehou het om in die Naam van die Here Jesus Christus te doop nie.

Ek erken dat dit 'n ware openbaring van die Heilige Gees verg om deesdae die waarheid aangaande die Godheid in te sien waar ons te midde van die verdraaiing van soveel van die Skrif staan. Maar die kerk wat staande bly en oorwin, is op openbaring gebou, dus kan ons verwag dat God Sy waarheid aan ons sal openbaar. Mens het egter nie eintlik 'n openbaring oor die waterdoop nodig nie. Dit is daar en staar mens in die gesig. Sou dit vir een oomblik vir die apostels moontlik gewees het om af te dwaal van 'n direkte bevel van die Here om te doop in die Naam van die Vader en die Seun en die Heilige Gees en om hulleself in doelbewuste ongehoorsaamheid te bevind? Hulle het geweet wat die Naam was, en daar is nie een plek in die Skrif waar hulle op enige ander manier gedoop het as in die Naam van die Here Jesus Christus nie. 'n Mens se gesonde verstand behoort hom te vertel dat die Boek Handelinge die kerk in aksie is, en as hulle op daardie wyse gedoop het, dan is dit die wyse om te doop. As u dink dit is sterk gestel, wat dink u hiervan? Elkeen wat nie in die Naam van die Here Jesus gedoop was nie, moes oorgedoop word.

Hand. 19:1-6: "En terwyl Apollos in Korinthe was, het Paulus die boonste landstreke deurgereis en in Éfese gekom; en daar het hy sommige dissipels gevind en hulle gevra: Het julle die Heilige Gees ontvang toe julle gelowig geword het? En hulle antwoord hom: Ons het nie eens gehoor dat daar 'n Heilige Gees is nie. En hy vra hulle: Met watter doop is julle dan gedoop? En hulle antwoord: Met die doop van Johannes. Daarop sê Paulus: Johannes het met die doop van bekering gedoop en aan die volk gesê dat hulle moes glo in die Een Wat ná hom kom, dit is in Christus Jesus. En toe hulle dit hoor, is hulle gedoop in die Naam van die Here Jesus. En Paulus het hulle die hande opgelê, en die Heilige Gees het op hulle gekom, en hulle het met tale gespreek en geprofeteer." Daar is dit. Daardie goeie mense in Éfese het gehoor van die Messias wat sou kom. Johannes het Hom verkondig. Hulle is gedoop tot bekering van sonde, om VOORUIT te kyk na geloof in Jesus. Nou was dit die tyd om TERUG te kyk na Jesus en om gedoop te word tot VERGEWING van sonde. Dit was tyd om die Heilige Gees te ontvang. En toe hulle in die Naam van die Here Jesus Christus gedoop is, het Paulus hulle die hande opgelê en die Heilige Gees het op hulle gekom.

O, daardie liewe mense in Éfese was goeie mense, en as enigeen die reg gehad het om gerus en versekerd te voel, was dit hulle. Kyk net hoe ver hulle gevorder het. Hulle het al die pad gekom tot by die aanvaarding van die Messias Wat sou kom. Hulle was gereed vir Hom. Maar sien u nie dat, ten spyte daarvan, hulle Hom misgeloop het nie? Hy het gekom en gegaan. Hulle het nodig gehad om in die Naam van die Here Jesus Christus gedoop te word. Hulle moes vervul word met die Heilige Gees.

As u gedoop is in die Naam van die Here Jesus Christus, sal God u met Sy Gees vervul. So sê die Woord. Handelinge 19:6 wat die vervulling was van Handelinge 2:38: "Bekeer julle, en laat elkeen van julle gedoop word in die Naam van Jesus Christus tot vergeweining van sondes, en julle sal die gawe van die Heilige Gees ontvang." Sien, Paulus, deur die Heilige Gees, het presies gesê wat Petrus deur die Heilige

Gees gesê het. En wat gesê is, KAN NIE verander word nie. Dit moet dieselfde bly van Pinkster af totdat die heel laaste uitverkorene gedoop is. Gal. 1:8: "Maar al sou ons of 'n engel uit die hemel julle 'n evangelie verkondig in stryd met dié wat ons julle verkondig het, laat hom 'n vervloeking wees!"

Dit is so dat sommige van julle Eenheid-mense vekeerd doop. Julle doop vir wedergeboorte, asof onderdompeling in water julle gered het. Wedergeboorte vind nie deur water plaas nie; dit is 'n werk van die Gees. Die man wat deur die Heilige Gees die bevel gegee het: "Bekeer julle, en laat elkeen gedoop word in die Naam van die Here Jesus" het nie gesê dat wedergeboorte deur water plaasvind nie. Hy het gesê dat dit slegs 'n teken was van 'n "goeie gewete voor God". Dit was al. 1 Pet. 3:21: "Waarvan die teëbeeld, die doop, ons nou ook red, (nie as 'n aflegging van die vuilheid van die vlees nie, maar as 'n bede tot God om 'n goeie gewete)-deur die opstanding van Jesus Christus." Dit glo ek.

As enigeen enige valse idees het dat die geskiedenis die waterdoop kan bewys op enige ander wyse as in die Naam van die Here Jesus Christus, sal ek hom aanraai om die geskiedenis te lees en self uit te vind. Die volgende is 'n ware rekord van 'n Doop wat in Rome plaasgevind het in die jaar 100 n.C. en het verskyn in die tydskrif TIME, 5 Desember 1955: "Die diaken het sy hand opgehef en Publius Decius het ingekom by die deur van die doopkapel. Marcus Vasca, die houthandelaar, het tot by sy middel in die poel gestaan. Hy het geglimlag terwyl Piblius in die water tot langs hom geloop het. 'Credis?' het hy gevra. 'Credo,' het Publius geantwoord. 'Ek glo dat my redding kom van Jesus die Christus, Wat gekruisig is onder Pontius Pilatus. Met Hom het ek gesterf sodat ek met Hom die Ewige Lewe kan hê.' Toe het hy gevoel hoedat sterk arms hom ondersteun terwyl hy terugval in die poel, en hy het Marcus se stem in sy ore gehoor — 'Ek doop jou in die Naam van die Here Jesus' — terwyl die koue water oor hom gesluit het."

Totdat die waarheid verlore gegaan het (en nie teruggekeer het tot hierdie laaste kerkeeu nie — d.w.s. van

Nicea af tot by die wisseling van hierdie eeu) het hulle gedoop in die Naam van die Here Jesus Christus. Maar dit het teruggekeer. Die Satan kan nie die openbaring onderdruk as die Gees dit wil gee nie.

Ja, as daar drie Gode was, kon mens wel gedoop het vir 'n Vader, 'n Seun, en 'n Heilige Gees. Maar die OPENBARING AAN JOHANNES was dat daar EEN GOD is en Sy Naam is HERE JESUS CHRISTUS, en daar word gedoop vir EEN - net een - God. Dit is waarom Petrus gedoop het soos hy wel by Pinkster gedoop het. Hy moes getrou bly aan die openbaring, naamlik "Laat dan die hele huis van Israel sekerlik weet dat God Hom HERE EN CHRISTUS gemaak het, HIERDIE JESUS wat julle gekruisig het." Daar is Hy "die HERE JESUS CHRISTUS."

As Jesus Here "EN" Christus is, dan is en kan Hy (Jesus) niemand anders wees as die - "Vader, Seun, en Heilige Gees" en EEN Persoon in die vlees geopenbaar nie. Dit is NIE "God in drie persone, geseënde drie-eenheid" nie, maar EEN GOD, EEN PERSOON met drie hooftitels, met drie hoedanighede wat in daardie titels geopenbaar word. Luister weereens. Hierdie selfde Jesus is Here EN Christus. Here (Vader) en Christus (Heilige Gees) is Jesus, want Hy (Jesus) is hulle ALBEI (Here EN Christus).

As dit ons nie die ware openbaring van die Godheid aantoon nie, sal nikks dit doen nie. Here is nie NOG 'n ander nie; Christus is NIE 'n ander nie. Hierdie Jesus is die Here Jesus Christus — EEN GOD.

Filippus het eendag vir Jesus gesê: "Here, toon ons die Vader, en dit is vir ons genoeg." Jesus sê vir hom: "Ek is so lankal by julle en julle ken My nie? Hy wat My gesien het, het die Vader gesien. Waarom sê jy: Toon ons die Vader? Ek en My Vader is Een." Ek het dit eenkeer aangehaal en 'n dame het gesê: "Net 'n oomblik, mnr. Branham, jy en jou vrou is een." "Nie só nie," het ek geantwoord.

Sy het gesê: "Ekskuus?"

Ek sê toe aan haar: "Sien jy my?"

"Ja" het sy geantwoord.

"Sien jy my vrou?" het ek gevra.

Sy het gesê: "Nee."

Ek sê toe: "Dan is daardie eenheid 'n ander soort eenheid,
want Hy het gesê: As jy My sien, sien jy die Vader."

Die profeet het gesê dat dit lig sou wees in die aand. In die lied staan daar:

It is a fact that God and Christ are one.
It'll be Light in the evening time,
The path to Glory you will surely find.
In the water way, that's the Light today,
Buried in the precious Name of Jesus.
Young and old, repent of all your sin,
The Holy Ghost will surely enter in.
The evening Light has come,
It is a fact that God and Christ are one.

Nie te lank gelede nie, het ek met 'n Joodse Rabbi gesêls.
Hy het vir my gesé: "Julle Heidene kan nie God aan drie
stukke sny en Hom vir 'n Jood gee nie. Ons weet van beter."

"Rabbi," het ek geantwoord, "dit is net die punt. Ons sny
God nie in drie stukke nie. U glo die profete, né?"

"Natuurlik," was sy antwoord.

"Glo u Jesaja 9:5?"

"Ja."

"Van wie het die profeet gepraat?"

"Die Messias."

Ek het gesê: "In watter verhouding sal die Messias tot God
staan?"

"Hy sal God wees," het hy gesê.

Ek het gesê: "Dis reg." Amen.

'n Mens kan nie God in drie persone plaas of in drie deel nie. 'n Mens kan nie aan 'n Jood vertel dat daar 'n Vader en 'n Seun en 'n Heilige Gees is nie. Hy sal jou sommer gou-gou vertel waar daardie idee vandaan kom. Die Jode weet dat hierdie geloofs-belydenis by die Niceense Raad ontstaan het. Geen wonder dat hulle ons verag as heidene nie.

Ons praat van 'n God wat nie verander nie. Dit glo die Jode ook. Maar die kerk het sy onveranderlike God verander van EEN na DRIE. Maar die lig keer terug in die awenduur. *Hoe treffend is dit dat hierdie waarheid kom in die tyd waarin die Jode na Palestina terugkeer.* God en Christus is EEN. Hierdie Jesus is BEIDE HERE EN CHRISTUS.

Johannes het die openbaring gehad en JESUS was die Openbaring en Hy het Homself hier in die Skrif bekend gemaak. — "EK IS Hy Wat Was, Wat Is, en Wat Kom, die Almagtige. Amen."

As openbaring buite u bereik is, kyk op en soek dit van God. Dit is die enigste manier waarop u dit ooit gaan vind. 'n Openbaring moet van God kom. Dit kom nooit deur menslike of natuurlike begaafdeheid nie, maar deur 'n aandoening van die Gees. U kan selfs die Skrif memoriseer, en alhoewel dit wonderlik is, sal dit nie werk nie. Dit moet 'n openbaring van God wees. Dit staan in die Woord dat niemand kan sê dat Jesus die Christus is nie, behalwe deur die Heilige Gees. Jy moet die Heilige Gees ontvang en dan kan die Gees aan jou openbaar dat Jesus die Christus is: God, die Gesalfde.

(Uit 'n Eksposisie van die Sewe Kerkeeue)

AFRIKAANS

©1992 VGR, ALL RIGHTS RESERVED

Voice Of God Recordings, South Africa Office

P.O. Box 178, Somerset West, 7129 Cape Province, Republic Of South Africa
www.branham.org

Kopiereg kennisgewing

Alle regte voorbehou. Hierdie boek mag gedruk word op 'n tuisrekenaar vir persoonlike gebruik of om uitgegee te word, gratis, as 'n middle om die Evangelie van Jesus Christus te versprei. Hierdie boek kan nie verkoop word, op groot skaal gereproduseer word, op 'n webtuiste geplaas word, in 'n opsoekstelsel geberg word, vertaal word in ander tale, of gebruik word om fondse in te samel, sonder die uitdruklike geskrewe toestemming van Voice Of God Recordings®, nie.

Vir meer inligting of vir ander beskikbare material, kontak asseblief:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org